

# Influenza da l'iniziativa «No Billag» sin il Grischun

Ina dumonda parlamentara da deputà Peter Peyer (ps Trin)

DA MARTIN CABALZAR

■ Il mars 2018 vegn il suveran svizzer probabel ad avair da decider davart l'iniziativa «No Billag» che pretenda ina midada da la Constituziun federala che regla la purschida da radio e televisiun. Damai che questa iniziativa avess grevas consequenzas sin il Grischun vul il deputà socialdemocrat Peter Peyer (Trin) savair da la regenza tge ch'ella quinta interpreter per sensibilisar la populaziun grischuna per questa tematica. L'iniziativa vul ch'i na vegnia betg pli incassà sin plaun federal taxas per retschaiver programs da radio e televisiun. Perencunter vul l'iniziativa en l'avegnir ingiantar questas concessiuns. L'iniziativa vul cunzunt stritgar il suandant passus en alinea 2 da l'artitgel 93 da la Constituziun federala che sa cloma: «Radio e televisiun contribueschan a la furmaziun, al svilup cultural, a la furmaziun libra da l'opiniun ed al divertiment. Els resguardan commensuradamain las atgnadads dal pajais ed ils bagens dals chantuns. Els rapportan objectivamain davart ils eveniments e dattan expressiun da la varietad d'opiniuns».

## Effects desastrus per il Grischun

Tenor Peter Peyer e consegnants avess questa iniziativa consequenzas grievantas per il Grischun. Betg mo per las minoritads rumantschas ed italianofas fiss il mantegniment da la purschida actuala da

radio e televisiun en rumantsch e talian. Pertutgads da l'iniziativa fissan natiralmain tant ils emetturs da radio e televisiun fitg frequentads dad SRF, dentant era Radio Südostschweiz e Tele Südostschweiz. RSO e TSO profitan numnadain era d'annualmain radund 6,7 miliuns or da las entradas da taxas da radio e televisiun. Tar Radio Südostschweiz vegn bunamain la mesadad, tar Tele Südostschweiz prest 70 pertschient dals custs curclada tras entradas da questas taxas. RadioTeleviun Svizra Rumantscha retschaiva annualmain radund 25 miliuns.

## Influenza sin la qualitad e sin l'indipendenza schurnalistica

Per ils standards da qualitad che sa chapeschan oz da sez, l'indipendenza publicistica e la varietad d'opiniuns e da cultura avess l'iniziativa – tenor Peyer – consequenzas negativas desastrusas. Entras abrogar las taxas ed ingiantar las concessiuns promovess ins ina commercialisaziun totala da la purschida da radio e televisiun. Quai tant pli che las relaziuns svizas cun lur quater martgads parzials uschè pitschens na lubeschan betg da manar ina chasa da medias electronica che purtass sa sezza. Uschia ha er il cussegl federal constatà 2016 en ses rapport davart il service public che mo radund 21,4 pertschient da la purschida da la SSR pudessan vegnir refinanziads sin il martgà liber. Schizunt



Il deputà socialdemocrat Peter Peyer vul che la regenza prenia posiziun tar l'iniziativa «No Billag» or da vista dal chantun e da sia populaziun. FOTO O. ITEM

ils formats da sport e da divertiment che vegnan manads cun grond success na pudessan betg garantir in'atgna finanziaziun, gnanc approximativamain. La cuntrada da medias dal Grischun cun sia purschida en trais linguas da l'inter-

presa publica SSR, dentant era las purschidas dals emetturs privats che vegnan finanziads per gronda part cun daners da taxas, fiss periclitada sensibilmain. En il sector dals meds electronics dessi probabel in desert total.

## Nagins avantatgs per consumentas e consumers

Plinavant è Peyer da la ferma persuasiun che l'iniziativa portia la finala sut il stritg era nagins avantatgs a las consumentas ed als consumers. Il cuntrari custass la purschida da radio e televisiun bler dapli sch'ella stuvess vegnir cumprada en tar purschiders privats e quai tenor criteris commercials e betg legitimads democraticamain. Sco exempel alleghescha Peyer ils gieus da la lia naziunala da la Germania che custan oz tar Pay TV dapli che quai che la singula chasada paja per l'entira concessiun da radio e televisiun en Svizra.

## Cun sensibilisar la populaziun

Ils interpellants èn da l'avis e da la ferma persuasiun ch'i fiss impussibel da realisar sin basa privata ed entras ingiantar las concessiuns da realisar ina purschida era mo approximativamain adequata en las trais linguas chantunals. Peyer è persuadi ch'il Grischun fiss il pli grond perdidder en quest sector dal service public sche l'iniziativa vegniss acceptada.

Da la regenza vulan ils interpellants savair co ella giuditgescha lur valetaziun dals effects negativs e nuschaivels da l'iniziativa sin il Grischun e sia populaziun? Plinavant vulan els savair tge la regenza quinta interpreter per sensibilisar la populaziun grischuna per questa tematica.